



Qiyaamaa mormitotaaf deebii Kenname-1

Description

Kutaalee darban keessatti Aakhiratti amanuun maal akka ta'ee fi maal akka of keessatti qabatu ilaalle turre. Aakhiratti amanuun gammachuu fi milkaa' inna nama tokko kan murteessudha. Sababni isaas, Aakhiraan gahuumsa xumuraa namoota hundaati. Namni jirenyaa keessatti gahuumsa ofii yoo hin beekin, garam akka deemu hin beeku. Jirenyaa tana keessa maaliif akka jiraatu ni wallaala. Rabbiin subhaanahu wa ta'aalaa iddo jirenyaa lama uumee. Tokkoffaan, iddo jirenyaa gabaabdu taate fi qormaanni itti adeemsifamuudha. Iddoon jirenyaa gabaabdun tunis addunyaa tana. Lamaffaan immoo iddo jirenyaa yeroo dheeraa turuu fi firiin qormataa (jazaan) itti mul'atuudha. Kanaafu, umriin iddo jirenyaa gabaabdun tuni erga xumurame booda Guyyaan iddoon jirenyaa dheeraan itti jalqabamuu ni dhufa. Kunis Guyya Qiyaamaa ta'a. Guyya Qiyaamaa kana namoonni du'an kaafamuun gara iddo jirenyaa lammataatti oofamu.

Seenaa keessatti namoonni dhugaa kana kijibsiisan baay'eedha. Namoonni erga du'anii akkamitti kaafamu? Lafeen isaanii erga bututtee booda eenyutu isaan kaasaa jechuun shakkii ofitti naqu. In sha Allaah shakkii kana har'a hanga dandeenyun qulqulleessuf ni carraaqna. Warroonni Qiyaamaatti amanuu didan yaadota armaan gadii hundee hin qabne irratti amantii isaanii ijaarun Qiyaamaa kijibsiisan. Yaadota isaanii deebii waliin haala armaan gaditiin ni ilaalla:

Yaada sobaa 1ffaa- "Khaaliqui jalqaba namoota uume lamuu deebisuu hin danda'u" jechuun yaadu. Sababni guddaan yaada sobaa kana akka yaadan isaan taasise dandeetti Uumaa fi dandeetti uumamtoota wal qixxeessudha. Uumamtoonni wanta bade deebisuu hin danda'an jedhanii waan yaadaniif Uumanii wanta bade deebisu hin danda'u jechuun yaadu. Yaada sobaa kana sammuu keessa kaa'un namoonni lamuu hin kaafaman jedhanii mormu. Qur'aanni yaada sobaa isaanii kanaaf karaa lamaan deebii kennaaf.

1ffaa- karaa wal madaalchisuu- Kana jechuun yeroo jalqabaatiif uumuu fi erga badee booda deebisu wal madaalchisu. Hundii keenya wanta duraan hin jirre uumuu irra wanta bade deebisuun akka salphatu ni beekna. Rabbiin subhaanahu wa ta'aalaa ilmaan namaa wanta duraan homaa hin turre irraa isaan uume. Jalqaba bishaan saalaa furrii fakkaatu irraa lafee, foon fi qaamolee addaa kan baase,

akkamitti biyyee erga ta'anii booda isaan deebisuu dadhabaa? Qondaaloota Makkaa keessaa gariin isaanii lafee shamte fiduun Ergamaa Rabbii (SAW) fuunduratti butuchan. Ergasii ni jedhan, "Yaa Muhammad! Namni du'e ni kaafama jetta. Mee nutti himi; lafee shamtee fi bututte tana eenyutu lamuu kaasa?" Ergasii Rabbiin subhaanahu wa ta'aalaa Aayata (keyyatoota) armaan gadi buuse:

﴿أَوْ لَمْ يَرَ الْإِنْسَنُ أَنَّا خَلَقْنَاهُ مِنْ نُطْفَةٍ فَإِذَا هُوَ حَصِيمٌ مُبِينٌ﴾
 ﴿٧٧﴾
 وَضَرَبَ لَنَا مَثَلًا وَنَسِيَ خَلْقَهُ وَقَالَ مَنْ يُحِيِّ الْعِظَمَ وَهِيَ رَمِيمٌ
 ﴿٧٨﴾
 قُلْ يُحْيِيهَا الَّذِي أَنْشَأَهَا أَوَّلَ مَرَّةً وَهُوَ بِكُلِّ خَلْقٍ عَلِيمٌ
 ﴿٧٩﴾

"Sila namni akka Nuti bishaan saalaa irraa isa uumne hin arginee? Yeroma san inni mormaa ifa bahaa ta'ee argama. Fakkeenya Nuuf godhee fi uumama isaa dagatee, "Lafee erga bututtee [booda] eenyutu jiraachisa?" jedha. "Kan yeroo jalqabaa ishii (lafee) uumetu jiraachisa." Jedhiin. Inni uumama hundaa Beekaaadha." Suuratu Yaasin 36:78-79

Rabbitiin subhaanahu wa ta'aalaa nama Qiyaamaa mormuu fi shakkuun akkana jechuun gaafata: "**Sila namni bishaan saalaa irraa akka isa uumne hin arginee?**" Kana jechuun namni lamuu kaafamu mormu jalqaba maalirraa Rabbitiin akka isa uume hin ilaalu? Bishaan saalaa dadhabaa qaama keessa faca'e bakka tokkotti walitti fiduun isa uume. Bishaan kanarrraa, lafee, foon, harka, ija, gurra fi qaamolee biroo akka uumee sila ilaalun lamuu deebifamutti hin amanuu? Bishaan dadhabaa qaama keessa faca'e walitti fiduun kan isa uume, lafee bututtee dachii keessa facaates lamuu akka deebisu haa beeku.

"Fakkeenya Nuuf godhee" Kana jechuun akka uumamtootaa dandeetti kan hin qabnee fi dadhabaatti Nu ilaala. Akkuma namni du'aa deebisuu hin dandeenye, "Rabbitiin nama du'e hin deebisu" jedhee yaada. **"uumama isaa dagatee, "Lafee erga bututtee [booda] eenyutu jiraachisa?" jedha."** Kana jechuun jalqaba bishaan du'aa lubbuu hin qabne irraa isa uumuu Keenya dagatee "lafee bututte eenyutu kaasa?" jedha. **"Kan yeroo jalqabaa ishii (lafee) uumetu jiraachisa."** Jedhiin.

Ilmi namaakuma jalqaba bishaan saalaa irraa nama uumuu hin dandeenye, lamuus nama kaasu hin danda'u. Rabbitiin Guddaan Olta'e immoo akkuma jalqaba nama bishaan saalaa irraa uume, lamuus ni deebisa. Kanaafu, dandeettin Rabbii fi dandeettin namaan gonkumaa wal hin fakkaatan. Rabbitiin wanta hundaa irratti Danda'aadha. Ilmi namaakuma immoo dadhabaadha. Rabbitiin wanta hundaa beekaaadha.

Karaa 2ffaa— Dandeetti Rabbii dachii fi samii keessatti mul'atu beeksisu- namni kaafama mormuu, "nama du'e deebisuu jalqaba uumuu caalaa ni ulfaata" jedhee yoo falme, Qur'aanni ragaa uumamaa namaati fi kaafama caalaa guddaa ta'etti dabarsa. Innis, uumama samii fi dachiiti. Akkuma namni hunduu beeku, uumamni samii fi dachii uumama fi kaafama namaan caala. Kan samii fi dachii garmalee gurguddatan kanniin uume akkamitti nama du'e kaasu dadhabaa? Rabbitiin ni jedha:

أَوْلَمْ يَرَوْا أَنَّ اللَّهَ الَّذِي خَلَقَ السَّمَاوَاتِ وَالْأَرْضَ وَلَمْ يَعِي بِخَلْقِهِنَّ
يُقَدِّرِ عَلَىٰ أَنْ يُحْكِمَ الْمَوْتَىٰ بَلَىٰ إِنَّهُ عَلَىٰ كُلِّ شَيْءٍ قَدِيرٌ

٢٣

“Rabbiin Kan samiiwwanii fi dachii uume, isaan uumuu keessatti Kan hin dadhabin du’aa jiraachisuu irratti danda’aa akka ta’e hin arginee sila? Eeyyen! Dhugumatti Inni waan hundaa irratti Danda’aadha.” suuratu Al-Ahqaaf 46:33

Rabbiin samii fi dachii garmalee guddatanii fi bal’atan uume, ilmaan namaa lamuu deebisuun gonkumaa Isarratti hin ulfaatu. Sababni isaas, Inni waan hundaa irratti Danda’aadha. Samii fi dachii uumuu keessatti homaa hin dadhabne. Namoota du’an deebisuun keessattis wanti Isa dadhabsiisu tokkollee hin jiru.

Yaada sobaa 2ffaa- “Namni du’e lafeen isaa bututtee dachii keessa baddi. Suuraa fi amalli isaa hundi ni bada. Kanaafu, Rabbiin nama lafeen isaa bututtee dachii keessatti badde akkamitti deebisaa?” Sababni guddaan yaada sobaa kana akka yaadan isaan taasisee, “Rabbiin lakkofsa namoota du’anii, lafeen isaanii eessa akka dhaqxuu fi wanta xiqqaaf guddaa hunda hin beeku.” Jedhanii waan yaadaniifi. Rabbiin subhaanahu wa ta’alaa yaada isaanii kana haala kanaan ifa godha:

وَقَالُوا إِذَا أَضَلَّنَا فِي الْأَرْضِ أَئِنَّا لِفِي خَلْقٍ جَدِيدٍ بَلْ هُمْ بِلِقَاءِ رَبِّهِمْ

كَفَرُونَ ١٠

“Ni jedhan, “Sila yeroo [duunee] dachii keessa bannee, dhugumatti uumama haarawa keessatti [lamuu ni uumamnaa]? Dhugumatti, isaan qunnamti Gooftaa isaanitti kan kafaraniidha.” Suuratu As-Sajdah 32:10

Rabbiin subhaanahu wa ta’alaa wantoota hundaa akka beeku isaanif mirkaneessa. Lakkofsa namoota du’anii, namoota dhalatanii fi wantoota samii fi dachii keessa jiru hunda takka takkaan beeka. Inuma, wanta nafseen isaanii isaanitti hasaastu fi wanta qalbii keessatti dhoksan hunda beeka. Lafee bututtee dachii keessa badde takka takkaan akka beeku akkana jechuun isaanif ibsa:

قَدْ عِلِّمْنَا مَا نَقُصُّ الْأَرْضَ مِنْهُمْ وَعِنْدَنَا كِتَابٌ حَفِظٌ

٤

“Dhugumatti, waan dachiin isaan irraa hir’iftu beeknee jirra. Galmee tiksatu Nu bira jira.” Suuratu Qaaf 50:4

Kana jechuun lafee, foon, gogaa fi rifeensa isaanii irraa wanta dachiin nyaattu dhugumatti ni beekna. Eessatti qaamni isaanii akka bittinaa'e fi lafeen isaanii bututte takka takkaan ni beekna. Dabalataan galmeen kuni hundi keessatti galmaa'e Nu bira jira. (Ibn Kasiir 7/395)

قَالَ الَّذِينَ كَفَرُوا لَا تَأْتِينَا الْسَّاعَةُ قُلْ بَلَى وَرَبِّي لَتَأْتِينَنَا مَعَلِمَ الْغَيْبِ لَا يَعْرِبُ عَنْهُ
كُلُّ ذَرَّةٍ فِي السَّمَاوَاتِ وَلَا فِي الْأَرْضِ وَلَا أَصْغَرُ مِنْ ذَلِكَ وَلَا أَكْبَرُ إِلَّا فِي كِتَابٍ مُّبِينٍ ﴿٧﴾

Warri kafaran, “Qiyaamaan nutti hin dhuftu” jedhan. Jedhi, “Akka isin jettanii miti. Rabbii kiyyaan kakadhe, dhugumatti isintti ni dhufti. [Rabbiin] Beekaa waan hin mul’anneeti. Wanti hanga madaala atamii, wanti sana irra xiqqaa fi kan sana irra guddaas samii keessaa fi dachii keessatti Isa irraa kan hin miliqne ta’ee kitaaba ifa baasaa ta’e keessa jiraatu malee hin hafu.” Suuratu Saba 34:3

Rabbiin wanta nutti mul’atuu fi hin mul’anne, nuti beeknu fi hin beekne hunda ni beeka. Xiqqeonya irraa kan ka’e, wanti hanga atamii ykn firii xaafii samii fi dachii keessatti Isarraa hin dhokatu. Lafeen hanga feete bututtee daaraa haa taatu, eessatti akka bittinoofte Rabbiin ni beeka. Kanaafu, Kan waan hundaa beeku fi Danda’aa ta’e nama du’e kaasun Isarratti hin ulfaatu.

Wanta nafseen isaanii isaanitti hasaastu beekumsi Isaa akka marseeakkana jechuun Ibsa:

وَلَقَدْ خَلَقْنَا أَلْإِنْسَنَ وَنَعْلَمُ مَا تُوَسِّعُ بِهِ نَفْسُهُ وَنَحْنُ أَقْرَبُ إِلَيْهِ مِنْهُ

جَبْلُ الْوَرِيدِ ١٦

“Dhugumatti, nama uumneerra. Waan lubbuun (nafseen) isaa itti hasaastus ni beekna. Nuti [beekumsa Keenyan] hidda dhiigaa caalaa gara isaatti dhiyoodha.” Suuratu Qaaf 50:16

Guduunfaa

?Rabbiin subhaanahu wa ta’alaa copha bishaan saalaa irraa ilmaan nama uume. Bishaan laafaa kanarrraa lafee, foon, harka, gurra, mar’imaa fi qaamoolee biroo uume. Rabbiin malee eenyutu bishaan saalaa kanarrraa nama dhaabbatee lukaan deemu uumu danda’aa?

?Rabbiin ilmaan nama taphaaf waan hin uumneef iddo jirenyaa lama isaaniif taasise. 1ffaa- iddo jirenyaa gabaabdu namni itti qoramuudha. 2ffaa iddo jirenyaa dheeraa namni firii qormaataa (jazaan wanta hojjataa turee) itti arguudha.

?Namni kaafama nama du’ee shakkuu waa sadii ilaalu danda’aa:

1ffaa-Uumama isaa kan jalqabaa. Copha bishaanii dadhabaa irraa Rabbiin isa uume. Copha bishaanii irraa kan isa uume lamuu deebisuun akkamitti itti ulfaata? Yoo kunis isaaq liqimfamu dide, Nabii Aadam (AS) biyyee irraa akka uumame haa yaadatu. Rabbiin akkuma Aadamin biyyee irraa uume ilmaan isaaas biyyee erga ta’anii booda ni deebisa.

2ffaa

-Dandeetti Rabbii samii fi dachii keessatti mul'atu haa ilaalu. Samii fi dachii garmalee gurguddatani fi bal'atan kanniin kan uume akkamitti nama du'e kaasun itti ulfaataa?

3ffaa-Dandeetti fi Beekumsi Rabbii kan namootaa irraa garagara akka ta'e haa beeku. Rabbiin wanta hundaa irratti danda'aadha, wanta hundaa ni beeka. Namni immoo wanta hundaa irratti danda'aa miti, wanta hundaa hin beeku. Namoota jalqaba irraa hanga xumuraatti du'an lafeen isaanii eessa akka dhaqxee Rabbiin takka takkaan beeka. Kanaafu, Guyyaa Qiyaamaa isaan kaasu irratti danda'aadha.

?Ilmi namaakuma jalqaba bishaan saalaa irraa nama uumuu hin dandeenyeye, lamuus nama kaasu hin danda'u. Rabbiin Guddaan Olta'e immoo akkuma jalqaba nama bishaan saalaa irraa uume, lamuus ni deebisa.

Kitaabban wabii:

[al-aqidatul Islaamiyyatu wa usuusuhaa](#) By Abdurahmaan Hasan Madiniyyi, fuula 573-577

Tafsiir Ibn Kasiir 7/395

<https://furtusammu.wordpress.com/2018/04/15/who-is-your-lord-no-7/>

Date Created

December 1, 2018

Author

admin